

Na osnovu člana 22 Statuta Brčko distrikta BiH («Službeni glasnik Brčko distrikta BiH» broj: 3/07), Skupština Brčko distrikta BiH na 43. sjednici održanoj 28. februara 2007. godine, usvaja

ZAKON O POMILOVANJU BRČKO DISTRIKTA BiH

GLAVA I

Član 1 (Predmet Zakona)

Ovim zakonom propisuju se nadležnost organa za davanje pomilovanja, krivična djela za koja se pomilovanje ne može dati, oblici pomilovanja i postupak u vezi s pomilovanjem za krivična djela iz nadležnosti sudova Brčko distrikta Bosne i Hercegovine.

Član 2 (Organ nadležan za davanje pomilovanja)

Gradonačelnik Brčko distrikta Bosne i Hercegovine (u daljnjem tekstu: gradonačelnik) može osuđenim licima dati pomilovanje:

- a) za krivičnopravne sankcije koje su izrekli sudovi Brčko distrikta Bosne i Hercegovine;
- b) za pravne posljedice osude.

Član 3 (Nemogućnost pomilovanja)

Pomilovanje se ne može dati za krivična djela genocida, ratnog zločina, zločina protiv čovječnosti i terorizma.

GLAVA II

Član 4 (Oblici pomilovanja)

Pomilovanjem se, poimenično, određenom licu:

- a) daje potpuno ili djelimično oslobađanje od izvršenja kazne ili zamjenjuje izrečena kazna blažom kaznom ili uslovnom osudom;
- b) ukida ili određuje kraće trajanje izrečene mjere sigurnosti zabrane vršenja poziva, djelatnosti ili dužnosti;
- c) ukida određena pravna posljedica osude ili određuje kraće trajanje;
- d) određuje brisanje osude.

Član 5 (Prava trećih lica)

Davanjem pomilovanja ne utiče se na prava trećih lica koja se zasnivaju na osudi.

Član 6 (Zamjena izrečene kazne uslovnom osudom)

U slučaju da se pomilovanjem zamjenjuje izrečena kazna uslovnom osudom, primjenjuju se odgovarajuće odredbe Krivičnog zakona Brčko distrikta BiH (u daljnjem tekstu: Krivični zakon) o uslovima za izricanje uslovne osude, njenom djelovanju i opozivanju, s tim što se uz uslovnu osudu ne određuje zaštitni nadzor niti se nalaže ispunjenje posebnih obaveza.

Član 7 (Brisanje osude pomilovanjem)

- (1) Brisanje osude pomilovanjem nije ograničeno visinom izrečene kazne niti vrstom krivičnog djela za koje je izrečena osuda, osim krivičnih djela iz člana 3 ovog zakona.
- (2) Brisanje osude pomilovanjem ima isto djelovanje kao brisanje osude po krivičnom zakonu.

GLAVA III

Član 8 (Pokretanje postupka pomilovanja i djelovanje molbe za pomilovanje)

- (1) Postupak za pomilovanje pokreće se molbom za pomilovanje (u daljnjem tekstu: molba) osuđenog lica.
- (2) Molbu može podnijeti i lice ovlašteno na podnošenje žalbe u korist optuženog, u skladu s odredbama Zakona o krivičnom postupku Brčko distrikta BiH.
- (3) Molba ne zadržava izvršenje krivičnopravne sankcije.

Član 9 (Pravovremenost molbe)

- (1) Molba se može podnijeti nakon pravosnažnosti presude.
- (2) Molba se može ponoviti nakon jedne godine od dana posljednje odluke o ranijoj molbi, a ako je izrečena kazna zatvora jednu godinu ili blaža kazna, molba se može ponoviti nakon šest mjeseci od dana posljednje odluke o ranijoj molbi.
- (3) Ako je izrečena kazna dugotrajnog zatvora, molba se može ponoviti nakon tri godine od dana posljednje odluke o ranijoj molbi.

Član 10 (Sadržaj molbe)

- (1) Molba treba da sadrži:

- a) lične podatke osuđenog lica (ime i prezime uključujući i prijašnja imena i prezimena, imena i prezimena roditelja, datum i mjesto rođenja, prebivalište, državljanstvo i slično);
- b) zakonski naziv krivičnog djela i član krivičnog zakona;
- c) podatke o presudi;
- d) podatke o pravosnažno izrečenoj krivičnopravnoj sankciji;
- e) podatke o naknadi ili umanjenju štete prouzrokovane krivičnim djelom i o oduzimanju imovinske koristi pribavljene krivičnim djelom;
- f) nalazi li se osuđeno lice na izdržavanju kazne, odnosno je li novčana kazna izvršena;
- g) činjenični opis krivičnog djela;
- h) navod kakva je bila izjava o krivici;
- i) podatke o porodičnim prilikama osuđenog lica (broj djece, posebno maloljetne, obaveze izdržavanja i slično);
- j) podatke o radu i obrazovanju osuđenog lica, uz navođenje izvora izdržavanja u slučaju nezaposlenosti;
- k) podatke o ranijoj osuđivanosti;
- l) navod postoje li neizvršene finansijske obaveze izdržavanja.

(2) Uz podatke i navode iz stava 1 ovog člana, molba treba da sadrži i:

- a) obrazloženje;
- b) izjavu kojom podnosilac potvrđuje da su podaci i navodi u molbi istiniti po najboljem saznanju;
- c) izjavu da će osuđeno lice poštovati pravni poredak Bosne i Hercegovine;
- d) datum podnošenja, potpis i adresu podnosioca.

Član 11 (Podnošenje molbe)

- (1) Molba se predaje Pravosudnoj komisiji Brčko distrikta Bosne i Hercegovine (u daljnjem tekstu: Pravosudna komisija).
- (2) Ako je molba predata drugom organu ili ustanovi za izvršenje krivičnopravnih sankcija, taj organ, odnosno ustanova bez odgađanja dostavlja molbu Pravosudnoj komisiji.
- (3) Osuđeno lice koje se nalazi na izdržavanju kazne zatvora molbu upućuje Pravosudnoj komisiji preko uprave ustanove za izvršenje krivičnopravnih sankcija u kojoj osuđeno lice izdržava kaznu.
- (4) Uprava je dužna pri dostavljanju molbe Pravosudnoj komisiji priložiti izvještaj o fizičkom i psihičkom stanju, psihološkom profilu i ponašanju osuđenog lica, uključujući i druge podatke koji bi mogli biti značajni za odlučivanje po molbi.

GLAVA IV

Član 12 (Postupanje po molbi)

Ako je molbu podnijelo neovlašteno lice ili je podnesena prije isteka roka iz člana 9 ovog zakona, Pravosudna komisija o tome obavještava podnosioca molbe, a molbu zajedno s pisanim obavještenjem dostavlja gradonačelniku.

Član 13 (Nepostojanje razloga za vođenje postupka pomilovanja)

- (1) Pravosudna komisija utvrđuje da ne postoje razlozi za vođenje postupka pomilovanja:
 - a) kada je, nakon podnošenja molbe kazna ili mjera sigurnosti već izvršena u odnosu na osuđeno lice;
 - b) ako je lice koje je ovlašteno na podnošenje molbe povuklo podnesenu molbu;
 - c) ako je osuđeno lice na koje se molba odnosi umrlo;
 - d) ako je donesena odluka suda povodom vanrednog pravnog lijeka.
- (2) Ako se molba odnosi na brisanje osude, odredba stava 1 tački a i c ovog člana se ne primjenjuje.

Član 14 (Relevantni podaci i informacije)

- (1) Pravosudna komisija o molbi obavještava upravu ustanove za izvršenje krivičnopravnih sankcija i sud koji je vodio prvostepeni krivični postupak, te od njih traži podatke i informacije iz člana 15 ovog zakona, te druge podatke i informacije koji mogu biti značajni za sastavljanje izvještaja o molbi.
- (2) Organi iz stava 1 ovog člana obavezni su bez odgađanja dostaviti podatke i informacije koje je zatražila Pravosudna komisija, a mogu dostaviti i druge podatke i informacije koji mogu biti značajni za odlučivanje o molbi.
- (3) Uz dostavu podataka, organi iz stava 1 ovog člana dostavljaju i pozitivno ili negativno mišljenje o pomilovanju s obrazloženjem i posebno naznačenim razlozima za i protiv pomilovanja.
- (4) Pravosudna komisija može podatke i informacije koje je podnosilac molbe naveo u molbi provjeriti i kod drugih organa, ustanova, organizacija i drugih pravnih lica, te od njih zatražiti i druge podatke koji bi mogli biti značajni za odlučivanje o molbi.

Član 15 (Izvještaj o molbi)

Pravosudna komisija sastavlja izvještaj o molbi koji sadrži:

- a) lične podatke osuđenog lica (ime i prezime uključujući i prijašnja imena i prezimena, imena i prezimena roditelja, prebivalište, državljanstvo, datum i mjesto rođenja i slično);

- b) podatke o fizičkom i psihičkom stanju osuđenog lica i njegovom psihološkom profilu;
- c) podatke o porodičnim prilikama osuđenog lica (broj djece, posebno maloljetne, obaveza izdržavanja i slično);
- d) podatke o radu i obrazovanju osuđenog lica;
- e) činjenični opis krivičnog djela i njegov zakonski naziv uz navođenje člana krivičnog zakona;
- f) podatke o presudi, podatke o pravosnažno izrečenoj krivičnopravnoj sankciji uz navođenje okolnosti koje je sud uzeo u obzir prilikom izbora vrste i visine kazne kao i olakšavajuće, odnosno otežavajuće okolnosti;
- g) podatke o izvršenju kazne i druge krivičnopravne sankcije, a za lica koja nisu upućena na izdržavanje kazne, podatke o razlozima zbog kojih osuđeno lice nije upućeno na izdržavanje kazne i za koji period je odgođeno izvršenje, da li je osuđeno lice na uvjetnom otpustu i do kada;
- h) podatke o ponašanju osuđenog lica (o pridržavanju pravila i naredbi uprave ustanove za izvršenje krivičnopravnih sankcija, odnosu prema drugim osuđenim licima i zaposlenicima, o pogodnostima i mjerama disciplinskog kažnjavanja i slično);
- i) podatke o ranijoj osuđivanosti (za koja krivična djela, na kakvu kaznu i drugu krivičnopravnu sankciju i da li je kazna i druga krivičnopravna sankcija izvršena);
- j) podatke o naknadi ili umanjeњу štete prouzrokovane krivičnim djelom i o oduzimanju imovinske koristi pribavljene krivičnim djelom;
- k) stručnu ocjenu o ličnim svojstvima osuđenog lica, stručnu procjenu o sklonosti ponavljanju počinjenja krivičnih djela i ocjenu o tome u kojoj je mjeri izvršeni dio kazne i druge krivičnopravne sankcije uticao na osuđeno lice;
- l) obrazloženo mišljenje o pomilovanju ustanove za izvršenje krivičnopravnih sankcija i suda koji je vodio prvostepeni krivični postupak.

Član 16 **(Obrazloženi prijedlog Pravosudne komisije)**

- (1) Pravosudna komisija dostavlja gradonačelniku molbu zajedno s izvještajem o molbi iz člana 15 ovog zakona i obrazloženi prijedlog Pravosudne komisije na odluku o pomilovanju.
- (2) Prijedlog iz stava 1 ovog člana može biti pozitivan i negativan.

GLAVA V

Član 17 **(Sadržaj odluke o pomilovanju)**

Odluka o pomilovanju sadrži:

- a) ime i prezime, imena roditelja, državljanstvo, datum i mjesto rođenja lica na koje se odluka odnosi;

- b) godinu prvostepene presude, godinu pravosnažnosti presude, koja je kazna i druga krivičnopravna sankcija izrečena te za koje krivično djelo, uz navođenje njegovog zakonskog naziva i člana krivičnog zakona;
- c) oblik pomilovanja koji se daje;
- d) vrijeme za koje se smanjuje kazna, krivičnopravna sankcija ili pravna posljedica osude, ako se radi o tim oblicima pomilovanja.

Član 18

(Dostava i obavještenje o odluci o pomilovanju)

- (1) Odluku o pomilovanju gradonačelnik dostavlja licu na koje se odnosi putem Pravosudne komisije.
- (2) O odluci iz stava 1 ovog člana Pravosudna komisija obavezna je obavijestiti podnosioca molbe, Osnovni sud Brčko distrikta BiH koji je vodio prvostepeni krivični postupak i upravu ustanove za izvršenje krivičnopravne sankcije.

Član 19

(Obavještenje i objava odluke o pomilovanju)

- (1) O svojoj odluci gradonačelnik obavještava javnost putem sredstava javnog informisanja.
- (2) Ako se odluka o pomilovanju odnosi na lice koje je bilo maloljetno u vrijeme činjenja krivičnog djela, prilikom obavještenja javnosti navodi se prvo slovo imena i prezimena umjesto cijelog imena i prezimena i ne navode se imena roditelja.
- (3) Odluka o pomilovanju objavljuje se u «Službenom glasniku Brčko distrikta BiH».
- (4) Uz svaku odluku o pomilovanju u «Službenom glasniku Brčko distrikta BiH» objavljuje se podatak o mišljenju suda koji je vodio prvostepeni krivični postupak i podatak o prijedlogu Pravosudne komisije.

Član 20

(Godišnji izvještaj)

- (1) Jednom godišnje gradonačelnik obavještava Skupštinu Brčko distrikta Bosne i Hercegovine o odlukama o pomilovanju donesenim prethodne kalendarske godine.
- (2) Obavještenje iz stava 1 ovog člana dostavlja se do 31. marta svake godine za prethodnu kalendarsku godinu, a sadrži broj datih pomilovanja, zakonske nazive krivičnih djela za koja su pomilovanja data i član krivičnog zakona, oblik datih pomilovanja, navode o mišljenju suda koji je vodio prvostepeni krivični postupak i prijedlogu Pravosudne komisije, za svako pomilovanje.
- (3) Obavještenje iz stava 1 ovog člana dostavlja se i sredstvima javnog informisanja.

GLAVA VI

Član 21

(Stavljanje van snage)

Stupanjem na snagu ovog zakona stavlja se van snage Zakon o pomilovanju Brčko distrikta BiH («Službeni glasnik Brčko distrikta BiH» brojevi: 8/00 i 1/01).

Član 22**(Stupanje na snagu Zakona)**

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Broj: 0-02-022- 20/07
Brčko, 28. februar 2007. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić